



Selasa, 03 September 2024

Ogen: Kejadian 25:27-31



Rayo-ayo



Nats paksa tenengta enda nuratken kerna orangtua si rayo-ayo i bas pebelin-belin anak; e me Isak ngenan atena Esau sabap ulihna erburu erbahanca entabeh lalap akap Isak man tapi Ribka ngenan atena Jakup selaku anak si nguda. Erayo-ayo nandangi kai pe i bas kegeluhen enda erbahanca turah persaingan si kurang mehuli; erayo-ayo erbahansa lanai siangkan sada nandangi sideban; erayo-ayo mpeturah gara i bas pusuh sabap perlakun si la bali nandangi sada ras sidebanna. Ribka ras Isak i bas ngaloken tuah idur Dibata nari, alu la iarapna erayo-ayo nandangi anak-anakna. Esau selaku anak sintua beluh erburu seh makana riahen akapna tading i kerangen janah agina Jakup sekalak si persinik dekahen tading i rumah; perlakun si berbeda ialokenna duana arah orangtuana. Isak selaku bapa lebih mperdiateken Esau anakna sintua; Ribka selaku nande lebih mperdiateken Jakup anakna singuda. Perbedan si ilakoken Isak-Ribka mempengaruhi karakter duana anak-anakna, perlakun si erayo-ayo arah orangtuana erbahanca turah persaingan lako ndatken perhatin arah orangtuana.

Kita pe megati selaku orangtua alu la sadar mperlakukan anak-anakta erayo-ayo. Anak si lebih beluh muat ukurta tentu ndatken perlakun lebih asangkan anak si mungkin menurutta kurang beluh muat ukurta. Erayo-ayo nandangi anak entah erayo-ayo nandangi keluarga; entahna pe erayo-ayo nandangi sierdahin banci peturah kurang siangkan bas anak, keluarga entah pe si erdahin. Perbahanen si erayo-ayo la terjeng erbahansa ukur kurang nyaman banci saja peturah perasaan cian jenari mpeturah ate nembah seh pe lanai si perkuanen; erkiteken sie perlu kal si jaga gelah perlakun si ibahan kita subuk ku anak-anak, keluarga, si erdahin/karyawan e me perlakun si adil. Bicara si beluh-beluhena gia anak e muat ukurta tapi perlu ka nge si jaga perukuren anak si kurang beluh; gelah arah perlakun si adil si ibahan kita nandangi anak-anak, keluarga bage pe si erdahin erbahanca meriah dengen malem atena.